

EPI canando e caminda pa renoba nan curriculum y trece opleidingnan nobo

By **Redaccion 36** - July 9, 2019



- Advertisement -

Ryan Maduro papiando di e retonan di e scol

ORANJESTAD (AAN): Director di Colegio EPI, Ryan Maduro a duna di conoce cu pa aña 2018-2019 EPI a conoce un mehoracion den su porcentahe di graduadonan.

Nan ta na 68% y si compara esaki cu e dos ultimo añanan escolar, por bisa cu na 2016-2017 tabata tin 62% y na 2017-2018 tabata tin 59%, a bisa.

Esaki ta muestra un mehoracion y EPI a gradua 287 profesional e aña aki. El a remarca cu e realidad di EPI ta cu como scol nan tarea principal ta duna profesionalnan na e mercado laboral. Tin un grupo cu ta scoge pa sigui studia y EPI semper ta stimula esey tambe.

Maduro a agrega cu tur cos semper mester wordo poni den un balanza. Tin hopi cos cu a bay bon pero EPI ta keda cu su retonan como scol. Un di e retonan mas grandi ta e parti financiero pa motivo cu nan ta un scol publico y nan ta depende di e presupuesto di gobierno.

Pa e ultimo 5 pa 6 año, aunke EPI ta pidi pa tin cierto cantidad den presupuesto pa por 'run' e scol. Di loke nan ta pidi nan ta haya solamente un parti di locual nan ta pidi y esey ta trece su retonan.

Ta importante pa comunidad keda corda cu EPI tin 1900 estudiante. Ora s scol a wordo diseña na 1997 pa 1100 estudiante y nan a sigui crece. "Esey ta un di e retonan grandi cu nos a deal cune y mi ta kere e ta exige creatividad di nos banda pero tambe di tur e stakeholders cu ta support EPI", a remarca.

Ryan Maduro a sigui bisa cu e año escolar aki el a expresa cu mester yega na un formula caminda cu 'bedrijfsleven' mester por forma parti integral di loke nan ta haci na scol, no solamente den inversion di placa, pero tambe den otro tipo di partnerships. Mester un trabao mas cerca di otro pa por haci esey posibel.

Segun Maduro, e inversion den EPI ta e resultado cu ta bek pa nan pasobra nan ta haya hendenan mihor prepara di locual ta entrega aworaki.

E otro reto cu tin ta e modelo di enseñanza. Ya caba e curriculum pa e ultimo dies añanan no a conoce un renobacion profundo. Ta canando un proceso aworaki pa haci e cambionan di curriculum pa por implementa e modelo di Hulanda cu yama BKS.

Na Augustus tin plannan pa cuminsa implementa esaki pa asina na Augustus 2020 un gran parti di nan opleidingnan ta renoba pero tambe cu opleidingnan nobo, a laga sa.

Un di e opleidingnan ta e ariba e parti di ICT cu ta asina importante y tambe nan ta explorando e area di trece niveau 5 cu ta 'social degree'. A indica cu den e '[nationale beleid beroepsonderwijs](#)' ta poni cu EPI tin goedkeuring pa haci niveau 5.

Kiermen, tin desaroyonan na caminda. No ta bay asina lihe manera ta desea, pero e resultado di e año aki cu e aumento di e porcentahe di graduadonan ta un trabao conhunto entre docentenan cu ta comprometi pa duna un mihor base pa e studentenan pa nan por haya nan diploma como e empleadonan cu ta traha na EPI y cu ta duna sosten na e personal docente, Ryan Maduro a duna di conoce.

Redaccion 36